

MISSES HUBBARD

Shushep Rich

Misses Hubbard unapema ueniat, kasseueiminua ek^u ama tanua¹. Ek^u itenimeuat anitshenat kutakat uemishtikushuat : « Innuat nipaietshenat. » Ek^u uin ishkieu mauat itenimeu tshetshi nipaianiti innua.

Put nishupipunnitshe kie peikupipunnitshe ek^u kueshpit, netu-tshissenimat. Uitshimeu – Akaneshass ishinikashu uemishtikushu ute etat – eukua kie uatshimat. Ek^u nete uiapamaht innua, ama nita uiesh tutakuat. Ek^u uetitaueuakue mishue, ama tauat innuat, napeuat. Kamushuasht nete ishinikatenu, tshitshue uaiu², tshitshue nutshimit. Ekute uetitaueuakue nikauipan, muk^u ishkieuat etaht, mishue anite Utshimassit tauat innuat, napeuat.

« Ek^u tiepuashimiht », iteu nikauipan, « nikushtananat. » —« *Eka kushinan, nitiniunna au'*, nitikunanatakat », iteu. « Nishuat innuat », iteu. « *Piekuakamit nutshinan'*, nitikunanatakat. Eukuanat pemaunaht nenua ishkieua », iteu.

¹ Ama tanua : apu taniti.

² Katak^u.

Ama uitamakuat kie ama nishtutueuat. Ama nishtutueuat nenua at aimikut innua. Ek^u anite itetshe memapuniht, ekute min Mushuau-shipit kutaka uetitauaht innua. Ek^u pet iapit anite minekash tauat ekunaht innua. Iapit ama uiesh tutakuat nashtish³, ama nanutshikakuat. Shash mitshetinua pet uiapamaht innua nete ueushitshimeht.

« Peikuu nitepauanan atik^u », iteu Akaneshass. « Nishtutshishikua nitapinan », iu. « Tshitshue mitshetu, mushinau⁴ pimishkau. Nishtutshishikua nashtish nitshi itapuanan, peikuannu ishinakushu tanite. Ek^u tshek pekuenitamat, ekue pet tshimautshit, pet pimapuniat Mushuau-shipit », iu.

Ek^u tanite Mushuau-shipit, anite ma uinuat, ekute iapit pet uinuaupunitshenat. Ekute uet pushitshenat kau, niate tshauapaniht.

Ek^u ama nitshissenimau tan nete etatshimuht, tanite eshk^u ama nimamituneniten, nitauassiun eshk^u.

³ Nashpit.

⁴ Nanitam.